



SUMBANGAN... Dr. Habibie menyampaikan sumbangan kepada salah seorang pelajar mangsa banjir.



SAMPAIKAN... Sumbangan disampaikan oleh Dr. Sabariah Sharif kepada Shahzrul .

Program Ziarah Pelajar FPP UMS bantu pelajar mangsa banjir

NST 25.07.2020 6

KOTA KINABALU: Prihatin terhadap musibah banjir yang menimpa beberapa pelajar Universiti Malaysia Sabah (UMS), Jawatankuasa Hal Ehwal Pelajar, Fakulti Psikologi dan Pendidikan (FPP) dengan kerjasama Jawatankuasa Kebajikan Staf fakulti tersebut telah mengadakan ziarah ke beberapa lokasi kediaman pelajar di daerah Kota Belud, Kudat, Kimanis dan Beaufort.

Program yang diketuai Timbalan Dekan Hal Ehwal Pelajar dan Alumni FPP, Dr Habibie Hj Ibrahim bersama kakitangan pentadbiran fakulti mengenal pasti enam pelajar fakulti itu untuk program ziarah tersebut.

Menurut Dr. Habibie, selain daripada menghulurkan sedikit sumbangan kepada pelajar-pelajar terlibat, pihak fakulti juga ingin mengetahui kesan bencana banjir tersebut kepada pelajar dan keluarga, khususnya dari

aspek proses pembelajaran pelajar.

"Pihak fakulti ingin meneroka dan mengetahui kekangan yang dihadapi oleh pelajar terlibat lebih-lebih lagi di dalam tempoh Perintah Kawalan Pergerakan Pemulihan (PKPP) ini.

"Hasil daripada ziarah ini, pihak fakulti berpendapat perlu ada tindakan susulan bagi membantu pelajar dan keluarga yang banyak terkesan terutamanya kepada pelajar yang datang daripada golongan B40.

"Ini adalah bagi menyuntik lagi semangat pelajar untuk bersama-sama membangunkan diri, terus bermotivasi, rasa tidak disisihkan dan sentiasa positif walau dalam apa jua keadaan yang ditempuhi," katanya.

Tambah Dr. Habibie, program sebegini juga mampu menyuntik perasaan kasih dan kekitaan dalam kalangan warga fakulti serta

masyarakat setempat untuk menjalankan tanggungjawab sosial masing-masing.

Mengulas lanjut, Dr. Habibie berkata, antara pelajar yang diziarah adalah pelajar tahun tiga Program Sains Sukan FPP, Mohd Ardy Jaslan, seorang pelajar matang dan aktif yang merupakan pelajar dari golongan B40.

"Bapa Ardy sudah lama terlantar akibat strok yang juga masih di dalam proses rawatan perubatan.

"Keadaan sekitar tempat tinggal keluarga ini masih banyak yang perlu diambil perhatian dan memerlukan tindakan pihak-pihak berkaitan.

"Diharap agar lebih ramai yang akan tampil membantu pelajar dan keluarga ini agar kesempurnaan di dalam kehidupan dapat sama-sama dikecapi," katanya.

Seorang lagi pelajar FPP dari golongan B40,

Shahzrul Marzilan dari Kampung Kitao, Tambunan turut turut menerima bantuan berbentuk kewangan yang disampaikan oleh Dekan FPP, Prof Madya Dr Sabariah Sharif.

Berbeza dengan Ardy, Shahzrul yang merupakan pelajar tahun tiga Program Belia dan Komuniti pada masa ini berada di kolej kediaman UMS bagi menjalani proses pembelajaran atas talian.

"Shahzrul memilih untuk berada dalam kampus sepanjang tempoh PKPP ini memandangkan kampung beliau mempunyai masalah capaian internet yang kurang baik," demikian menurut Dr. Sabariah.

Beliau turut berharap agar bantuan yang disampaikan mampu meringankan beban keluarga Shahzrul yang terjejas akibat banjir, serta dapat menampung perbelanjaan Shahzrul sepanjang berada di kampus.